

Kanisa Kuzaa Kanisa

Mtafutani Bwana, maadamu anapatikana, Mwiteni, maadamu yu karibu—
Isaya 55:6.

Washiriki wa kanisa wanapaswa kuondoka na kuangaza katikati ya giza la ulimwengu la kimaadili. Tukiwa tumeunganisha na Yeye aliye nuru ya ulimwengu, tutawaangazia wengine nuru. Tukiwa washirika wa neema nyingi ya Mwokozi, tutakuwa Baraka kwa wale wanaotuzunguka....

Wengi wanaokiri kuwa wafuasi wa Yesu wanatafuta kuwa wa kwanza ndiyo maana Hawezi kuwaamini. Laiti wangekuwa wanyenyekevu, wakihiari kufundishwa Naye, wangekuwa nguvu katika kuuonesha ulimwengu mvuto wa ukweli katika tabia ya mwanadamu. Wale wanaotenda kazi katika njia ya Yesu, kamwe wasitake kujitukuza nafsi, wataonesha kufanya kazi daima na maendeleo thabiti katika shughuli za utume. Hawataridhika mpaka pale kanisa litakapozaa kanisa lingine.

Mungu anatarajia wale walio katika utumishi Wake waipigania kwa bidii ile imani iliyotolewa mara moja tu kwa watakatifu. Kazi yetu ya haraka ya umishenari inapaswa kufanywa kwa wingi zaidi kuliko ilivyokuwa zamani. Eneo zaidi linapaswa kuunganishwa; kiwango cha ukweli kinapaswa kupandwa katika maeneo mapya; makanisa yanapaswa kuanzishwa; yote yanapaswa kufanywa ili kutimiza tume, "Basi, enendeni, mkawafanye mataifa yote kuwa wanafunzi, mkiwabatiza kwa jina la Baba, na Mwana, na Roho Mtakatifu; na kuwafundisha kuyashika yote niliyowaamuru ninyi; na tazama, mimi nipo pamoja nanyi siku zote, hata ukamilifu wa dahari."

Uhai wa kanisa unategemea mvuto ambao washiriki wanauonesha kwa wale walioko nje ya zizi. Hebu kanisa la Mungu na likumbuke kwamba Yesu alijitoa maisha Yake kuwa kafara ili kuiokoa dunia mbali na uharibifu. Alikuwa maskini kwa ajili yetu, ili kwamba sisi kupitia umaskini Wake tuweze kupata kumiliki utajiri wa milele. Je! Wale ambao Mungu amewabariki kwa ujuzi wa ukweli watapungua katika kutekeleza mipango yao? Hebu na wainuke katika utambuzi wa majukumu yao mengi, wakikatilia mbali kila uzi wa ubinafsi, ili kwamba Bwana awamwagie juu yao Roho Wake Mtakatifu.

Hebu na wamtafute Bwana maadamu bado anapatikana na wamwite Yeye maadamu Yu karibu. Hawana sababu yoyote ya kuwafanya kukosa imani na kuwa walalamishi. Hebu na wakomeshe kutafuta makosa kote na kunung'unika na wavutie roho ya kushukuru kwa ajili ya rehema na Baraka zilizopita. Hebu na wamsifu Bwana kwa shukrani ya kweli kwa ajili ya nuru ya Neno Lake, inayoangaza njiani mwao, ili ipokelewe katika moyo na akili na kuakiswiwa kwa wale walio gizani. Kwa namna hiyo wataandaliwa kufanya kazi kwa sifa na utukufu wa Yesu na kuandika katika mabango yao, "Hao wazishikao amri za Mungu, na imani ya Yesu" (*Ufunuo 14:12*) (*The Signs of the Times, Agosti 21, 1901*).